

Aaqqiissutitut nassiuissaq
(siusinnerusukkut siunnersuutaasumut 29. juli 2004-imeersumut taartaasoq)
(taamaallaat teknikkikkut aaqqiissutit annertunerungitsut pineqarput)

**Aningaasarsianit akileraarutit pillugit Inatsisartut inatsisaata
allanngortinneqarneranik Inatsisartut inatsisaannut nr. xx, xx. xxxxxxxx 2004-
meersumut siunnersuut.**

(Aningaasarsianik angissusiliisarnerup naammagittaalliuteqarsinnaanerullu
aaqqissuussaaneranik pisariillisaajumaneq kiisalu iluanaarutinik
akileraarusersuisarnermut allannguuteqartitsineq)

§ 1

Aningaasarsianit akileraarutit pillugit Inatsisartut inatsisaanni nr. 5, 19. maj 1979-
imeersumi, Inatsisartut inatsisaatigut nr. 2, 21. maj 2004-meersukkut kingullermik
allanngortinneqartumi makku allannguutigitinneqarput.

1. § 19-imi imm. 1-p kingorna immikkoortutut nutaatut ilanngunneqassaaq:
"Imm. 2. Taamaattorli iluanaarutit § 70 a naapertorlugu iluanaarutisianit
akileraarutinik unerartitsiffigineqarsimasut aningaasarsiat akileraaruteqaataasussat
naatsorsorneqarneranni ilanngaatigineqarsinnaanngillat.". Imm. 2-5 matuma
kingorna tassaalerput imm. 3-6.

2. § 19-imi, imm. 3-mi aamma imm. 4-mi allassimasut, imm. 4 aamma 5-inngortuni,
"imm. 1 aamma 2-miittut" allanngortinneqassapput ima: "imm. 1 aamma 3-miittut",
ammalu § 19, imm. 5-imi allassimasoq, imm. 6-inngortumi, "Imm. 3"
allanngortinneqassaaq ima: "Imm. 4".

3. § 21, imm. 4-mi oqaaseqatigiit aappaattut nutaatut ilanngunneqassaaq:
"Kinaluunniit, selskabip amigartooraasa ukiunut tullernut
nuunneqarsinnaanerannik ilisimasariaqartutut isigineqarsinnaasoq
taamaaliorssinnaaneq pillugu siumut akuersissummik
allanngortinneqarsinnaanngitsumik Skatterådimut qinnuteqarsinnaavoq.".

4. § 24, litra 11, ima oqaasertaqassaaq:
"11) pisortanit ikuutisiat:
a) pisuni ataasiakkaani naliliineq tunngavigalugu pisortanit pensionisianut

tapiliussatut, matumani aamma meeqyanut tapiliussatut tunniunneqartut,
b) annertusisamik pisariaqavissuinnarnut ikorsiissutitut, matumani aamma
ataasiartumik ikorsiissutitut, nuunnermi ikuutisiatut, ilisinermi ikuutisiatut,
angerlarsimaffimmi ikiorteqarnermut aamma angerarluni angalanermut ikuutisiatut
tunniunneqartut,
c) ineqarnermut tapiissutitut tunniunneqartut,
d) meeqyanut inuusuttunullu ikorsiissutitut tunniunneqartut,
e) inunnut annertuumik innarluuteqartunut ikorsiissutitut tunniunneqartut,
f) piginnaanngorsaqinnejarnermut atatillugu ataasiartumik ikorsiissutitut immikkut
ittumik tapiissutitut tunniunneqartut.".

5. § 34 b-p kingornanut ilanngunneqassaaq:

"**§ 34 c.** Inuk § 1 naapertorlugu akileraartussaatitaasoq pisariaqavissuinnarnut
ikorsiissutinik § 24, litra 11 malillugu akileraaruteqaataasussaanngitsutut
isigineqanngitsunik pissarsisimappat, akileraarutissat tamarmiusut aningaasarsiat
taakku akileraarutitaannut naapertuuttumik annertussusilinnik appartinneqassapput.".

6. § 41, imm. 1-imi allanngortinneqassapput ima " 40 pct." 45 pct.-inngorlugu"
amma " 20 pct." " 23 pct.-inngorlugu. ".

7. § 47, imm. 2-mi ima oqaasertaqassaaq:

"*Imm. 2. Siumoortumik nalunaarsuineq akileraaruseriffimmit isumagineqassaaq.*".

8. § 48, imm. 1-imi, 2-imi, 3-imi, 4-milu allassimasoq "*kommissionip
akileraarusiisartup*" allanngortinneqassaaq ima: "*akileraaruseriffiup*".

9. § 51 ima oqaasertaqassaaq:

§ 51. Kommunimi akileraartarnermut oqartussaasut (pisortat akileraarusiisartut)
akileraarusiinermik suliaqarnissaannut pilersaarut Skatterådip ukiut tamaasa
suliarisassavaa. Pilersaarutip malinneqarnissaa kommunalbestyrelsip akisussaaffigaa.
Imm. 2. Kommunalbestyrelsip inuk kommunimi atorfeqartoq, kommunip
akileraaruseriffiani akileraarusiinermik sulinermi akisussaasuuusussaqq toqqassavaa.
Kommunalbestyrelsi kommunip akileraaruseriffiata aalajangiinerinut imaluunniit
akileraaruseriffiup aalajangiinerinut naammagittaalliuutaasunik suliaqarnissamut
akuliussinnaanngilaq.

Imm. 3. Aammattaaq Akileraartarnermut Pisortaqrifiup § 33, imm. 2-mi
taaneqartunik akileraarusiinissaanut pilersaarut Skatterådip ukiut tamaasa
suliarisassavaa.

Imm. 4. Akileraartarnermut Pisortaqrifiup inuk pisortaqrifimmi atorfeqartoq,
pisortaqrifimmi akileraarusiinermik sulinermi akisussaasuuusussaqq toqqassavaa.".

10. § 51-ip kingornanut ilanngunneqassaaq:

§ 51 a. Kommunalbestyrelsit marluk amerlanerusulluunniit Naalakkersuisut
akuersissuteqareernerisigut inuk kommunit arlaanni atorfeqartoq, kommunini
pineqartuni akileraartussaatitaasunut tamanut ilaannulluunniit tunngatillugu
akileraarusiinermik kommunip akileraartarnikkut oqartussaasuisa suliaqarneranni
qullersaalluni akisussaasuuusussaqq toqqarsinnaavaat, tak. § 51, imm. 2. Kommunit
akileraartarnermut allaffeqarfimmik ataatsimoorussamik peqarsinnaanerannik

Naalakkersuisut akuersissutertik naleqquttumik piffissaliillutik atorunnaarsissinnaavaat, akuersissuteqarnermut piumasqaatit naammassineqarsimannngitsutut Naalakkersuisunit nalilerneqarpata.
Imm. 2. Kommunalbestyrelsit akileraarusiinermi suleqatigiissut, pilersaarutip malinneqarnissaa § 51, imm. 1-imi taaneqartoq akisussaaffigissavaat.".

11. § 51 a-p kingornanut ilanngunneqassaaq:

"**§ 51 b.** Kommunalbestyrelsip ataatsip arlaqartulluunniit ataatsimoorlutik Naalakkersuisut akuersissuteqareernerisigut Akileraartarnermut Pisortaqaqrifimmik isumaqateqarlutik kommunimi akileraartarnermut oqartussaasut kommunimi pineqartumi kommuniniluunniit pineqartuni akileraartussaatitaasunut tamanut ilaannulluunniit tunngatillugu akileraarusiinermik suliassat tamaasa ilaalluunniit akiliuteqarnermikkut Akileraartarnermut Pisortaqaqrifimmut nuussinnaavaat. Pilersaarutip malinneqarnissaa § 51, imm. 1-imi taaneqartoq Akileraartarnermut Pisortaqaqrifiup akisussaaffigissavaa.

Imm. 2. Akileraartarnermut Pisortaqaqrifiup, kommunimi akileraaruseriffiup kommunimilu ingerlatsiveqarfiiit allat akornanni paasissutissanik kommunimi paarlaasseqatigiissinnaanerisuuilli kommunimi kommuniniluunniit attuumassuteqartuni ingerlatsiveqarfiiit allat paasissutissanik paarlaasseqatigisinnaavai.".

12. § 51 b-p kingornanut ilanngunneqassaaq:

"**§ 51 c.** Akileraartarnermut pisortat nammineerluni nalunaarsuiffissat akileraartussaatitaasunut tamanut, akileraartartunit ukiumi akileraarusiiffimmik januarip aallaqqaataata kinguninguatigut piaernerpaamik tiguneqartussanngorlugit nassiussussavaat. Naalakkersuisut nammineerluni nalunaarsuiffissat qanoq ilusilersorneqarnissaannut nassiussorneqarnissaannullu maleruagassiat aalajangersassavaat, taamatullu aamma immersugassat akuersissutigisimasamik akileraartussaatitanit qanoq atorneqarnissaannut maleruagassianik aalajangiissallutik.

Imm. 2. Akileraartartup nammineerluni nalunaarsuiffissanik nassinneqanngitsoornera nammineerluni nalunaarsuinissamut pisussaajunnaarsitsinngilaq.

Imm. 3. Nammineerluni nalunaarsuut ukiumi akileraarusiiffimmik kingusinnerpaamik ulloq 1. marts nassiunneqassaaq. Nammineerluni nalunaarsuut pisortanut akileraarusiinermik suliaqartusanut nassiunneqassaaq, tak. § 51, imm. 1.

Imm. 4. Pisortat akileraarusiisartut nammineerluni nalunaarsuummik nassitsinissap kinguartinneqarnissaa immikkut pissutissaqartillugu akuersissutigisinnaavaat, tamanna akileraarusiilluni sulinerup aaqqissuunneqarneranut piffissarlu eqqorlugu inerneqarnissaanut akornutaanngippat.".

13. § 54-ip kingornanut ilanngunneqassaaq:

"**§ 54 a.** Pisortat ingerlatsiviannit pisortallu ingerlatsiviannut saaffiginninnerni attaveqaatit digitaliusut atorneqarsinnaanerat pillugu Naalakkersuisut aningaasarsianit akileraarutit pilligit akileraartarnerup tungaatigut maleruagassiorsinnaapput, matumani aamma attaveqaatit digitaliusut atorneqarsinnaannginneri pilligit inatsisini piumasasut saneqqussinnaallugit.

Imm. 2. Allakkiat atsiorneqanngitsut, atsiornermilluunniit maskiinakkoortumik allatulluunniit atsiornillit sananeqarsinnaanerat pillugu maleruagassat Naalakkersuisut akileraartarnerup tungaatigut aalajangersarsinnaavaat, taamaalilluni

allakkiaq allakkiamut inuup nammineq atsiorsimasaanut inatsisit tungaasigut sanilliunneqarsinnaanngorlugu.".

14. § 55 imatut oqaasertaqassaaq:

"**§ 55.** Akileraarutinik angissusiliineq ukiup aningaasarsiorfiusup angissusiliiffigisap tulliani qaammatisiutit malillugit ukiumi kingusinnerpaamik 1. september naammassineqareersimassaaq (piffissaq akileraarusiiffimmut killiliussaq).

Kommunemi akileraartarnermut oqartussaasut akileraarutinik angissusiliinernik piffissap akileraarusiiffiup ingerlanerani allanngortitsisinnaapput.

Imm. 2. Siusinnerusukkut angissusiliineq nakkutilliinermi paasissutissat, uppernarsaatissat taakkununngaluunniit aaqqiissutissat kingusinnerusukkut tiguneqarnerat pissutigalugu, ilanngaat aalajangersimasoq aningaasarsialluunniit B-t akileraaruteqaataasussaangitsut kukkusumik ilanngaatigineqarsimanera pissutigalugu imaluunniit akileraartussaatitaanerup allannguuteqarnera pissutigalugu allanngortinneqassappat, kommunimi akileraartarnermut oqartussaasut angissusiliineq ukiup aningaasarsiorfiusup pineqartup naanerata kingorna qaammatisiutit malillugit ukiup akileraarusiiffiup tulliani ulloq 1. september tikillugu suliareeqqissinnaavaat.

Imm. 3. Skatterådip kommunimi akileraartarnermut oqartussaasut, piffissap akileraarusiiffiusup qaangiutereerneratigut akileraarutinik angissusiliinissamut imaluunniit allannguinissamut piginnaatissinnaavai.

Imm. 4. Skatterådi akileraarutinik angissusiliinermik isummerfiginnissimatillugu kommunimi akileraartarnermut oqartussaasut angissusiliisinggaanngillat allanngortitsisinnaanatilluunniit. Aamma akileraarutinik angissusiliineq Skatterådimit suliarineqartillugu kommunimi akileraartarnermut oqartussaasut angissusiliisinggaanngillat allanngortitsisinnaanatilluunniit. Oqaaseqatigiit aappaanni taaneqartutut ittunik pisoqartillugu kommunimi akileraartarnermut oqartussaasut allanngortinniagartik pillugu Skatterådi ilisimatissavaat.

Imm. 5. Kommunimi akileraartarnermut oqartussaasut nammineerluni nalunaarutigineqartunit allaanerusumik tunngaveqarlutik akileraarutinik angissusiliiniarpata, matumani aamma nammineerluni nalunaarsuiffik pisusussamisoortoq pigineqanngippat, imaluunniit kommunimi akileraartarnermut oqartussaasut nammineerluni nalunaarsugassat akileraarutinik angissusiliinermi tunngaviusussat ilaannik allannguiniarpata akileraartussaatitaasoq tamatumiinnga allakkatigut ilisimatinneqassaaq. Akileraartussaatitaasoq tassunga ilutigitillugu aamma ilisimatinneqassaaq, akileraartussaatitaasoq akileraarutinik angissusiliinermut akerliulluni piffissaliussap allakkat ullulerneqarneranniit sapaatip akunnerinik 4-inik sivikinnerunngitsup ingerlanerani allakkatigut oqaasiinnakkulluunniit tunngavilersuilluni akileraartarnermut oqartussaasunut saqqummiussaqanngippat akileraarutinik angissusiliineq siunniunneqartutuut angissusilerneqassasoq. Akileraartussaatitaasoq piffissaliussaq naatinngu oqaaseqaateqarsimannngippat, akileraartarnermut oqartussaasut ilisimatitseqqeqluaratik akileraarutinik angissusiliinissaq siunnersuutigineqartutuut iluseqartillugu angissusilersinnaavaat. Akileraartussaatitaasoq piffissaliussap qaangiutinnginnerani oqaaseqaateqarpat akileraarutinik angissusiliineq (nalunaarutiginnineq) allakkatigut ilisimatitsissutigineqassaaq.

Imm. 6. Imm. 5-imi oqaaseqatigiit siullersaanni aappaannilu taaneqartutuut ilisimatitsisoqartariaqanngilaq akileraarutinik angissusiliineq akileraartussaatitaasup

qinnuteqarneratigut pippat, aammalu qinnuteqarneq aalajangiinermi tamakkiisumik malinneqarpat. Taamaanngippat akileraarutinik angissusiliineq (nalunaarutiginneq) allakkatigut ilisimatitsissutigineqassaaq. ".

15. § 56 imatut oqaasertaqassaaq:

"**§56.** Kommunini akileraartarnermut oqartussaasut § 55 naapertorlugu aalajangiinerinut naammagittaalliuutit Skatterådimit suliarineqartarpot.

Imm. 2. Naammagittaalliuut Skatterådimut nassiunneqassaaq. Naammagittaalliuut Skatterådimit tiguneqareersimassaaq naammagittaalliuutigineqartumut aalajangiinerup ullulerneqarneraniit sapaatip akunneri sisamat qaangiutsinnagit, imaluunniit aalajangiineq immikkut ilisimatitsissutigineqarsimanngippat, tak. § 55, imm. 6, inaarummik naatsorsuinerup nalunaarutigineqarneraniit. Naammagittaalliuut piffissaliussap qaangiutereerneratigut nassiunneqarpat itigartinneqassaaq. Piffissaliussap qimmorneqarnera Skatterådip immikkut ittunik pissutissaqartillugu qaangerneqarsimappat akuerisinnaavaa.

Imm. 3. Skatterådimut naammagittaalliuut allakkatigoortuussaaq. Aalajangiinerup naammagittaalliuutigineqartup naeqqaarneqarnera assilineqarneraluunniit naammagittaalliuummut ilanngunneqassaaq. Naammagittaalliuummi allassimassapput aalajangiinerup sutigut eqqunngitsuusorineqarnera tassungalu tunngavilersuut. Allakkiat upternarsaatitut atorumaneqartut naeqqaarneqarneri assilineqarneriluunniit naammagittaalliuummut ilanngunneqassapput.

Imm. 4. Naammagittaalliuutip ilusiligaanera tunngavilersugaaneraluunniit pissutigalugit suliap suliareqqinnejarnissaanut tunngavissatut atorneqarsinnaanngippat, Skatterådip naammagittaallioroq piffissalerlugu perarfississinnaavaa amigaataasumik aaqqiinssamut. Naammagittaalliorutup amigaataasoq piffissaliussap naannginnerani aaqqinngippagu suliassaq itigartitsissutigineqassaaq.

Imm. 5. Skatterådi naammagittaalliuummik aalajangiiffignitsinnagu pisortat oqartussaasut naammagittaalliuutigineqartumik aalajangiisimasut oqaaseqaataannik piniartoqassaaq. Pissutsit aalajangiinermut naammagittaalliuutigineqartumut tunngasutilit immikkut pissutissaqartippassuk Skatterådi qinnuteqartoqarneratigut sivisunerusumik piffissaliisinnaavoq.

Imm. 6. Skatterådi naammagittaalliuummik aalajangiiffignitsinnagu suliap saqqummiunneqarnera suliarineqaqqaassaaq. Suliap saqqummiunneqarnerani nassuaatigineqassapput paassisutissaviit suliamut tunngassuteqartut aalajangiinissami pingaruteqartutut isiginiaakkat. Naammagittaalliorutup piumasaa rådip tamakkiisumik isumaqtigisinnaanngippagu suliap saqqummiunneqarnera naammagittaalliorumut nassiunneqassaaq, piffissaliussap erseqqinnerusumik ullulerneqarsimasup sapaatit akunnerinik sisamanik sivikinnerunngitsup ingerlanerani saqqummiussinermut oqaaseqaateqaqqullugu kajumissaarlugu.

Imm. 7. Skatterådi naammagittaalliuut qanorluunniit imaqlarluarpat pisinnaatitaavoq angissusiliineq ataatsimut tamaat aalajangiiffigisassanngorlugu tigussallugu.

Imm. 8. Naammagittaallioroq Skatterådimik oqaloqateqarnermigut oqaaseqaateqarnissaminik perarfissinneqarumasinnaavoq.

Imm. 9. Skatterådip aalajangiinera nalunaarutiginninnikkut suliarineqassaaq.".

16. § 57 imatut oqaasertaqassaaq:

"**§ 57.** Skatterådip kommunini akileraartarnermut oqartussaasut angissusiliineri

misissugassanngorlugit allanngugassanngorlugillu qaqqeqqissinnaavai. Angissusiliinermik qaffaaneq, angissusiliineq missingersuutaannarmik tunngaveqartillugu pisinnaanngilaq ukiup aningaasarsiorfiup pineqartup naaneraniit ukiut tallimat qaangiutereersimatillugit.

Imm. 2. Skatterådi aalajangiitinnagu suliap saqqummiunneqarnera suliarineqaqqaassaaq. Suliap saqqummiunneqarnerani nassuiaatigineqassapput paasissutissavii suliamut tunngassuteqartut aalajangiinissami pingaaruteqartutut isiginakkat. Suliap saqqummiunneqarnera akileraartussaatitaasumut nassiuunneqassaaq, piffissaliussap erseqqinnerusumik ullulerneqarsimasup sapaatip akunnerinik sisamanik sivikinnerunngitsup ingerlanerani saqqummiussinermut oqaaseqaateqaqquallugu kajumissaarlugu.

Imm. 3. Skatterådip suliassat § 56 aamma § 57, imm. 2 malillugit aalajangiiffigineqarsimasut suliareqqissinnaavai. Suliareqqiinermi imm. 2-mi aalajangersakkat atuutissapput.".

17. § 58 atorunnaarsinneqassaaq.

18. § 59 ima oqaasertaqassaaq:

"**§ 59.** Skatterådip § 21, imm. 4, § 56, § 57 kiisalu § 66, imm. 2 malillugit aalajangiineri akileraartussaatitamit Kalaallit Nunaata Eqqartuussivianut suliarinnittussamut siulliusumut suliassiissutigineqarsinnaapput, aalajangiinerup kingorna qaammatit arfinillit qaangiutsinnagit. Pissutsinik immikkorluinnaq ittunik tunngavissaqartillugu, landsdommerip piffissaliunneqartoq qimmorneqarluarpalluunniit suliassiissutigineqartoq akuersaarsinnaavaa. Suliassiissutigineqartut tassaapput Kalaallit Nunaanni Naalakkersuisut.

Imm. 2. Suliap Skatterådimut suliassiissutigineqarneraniit qaammatit aqqaneq-marluk qaangiussimappata, Skatterådi aalajangiisimanngikkaluarpalluunniit suliaq Kalaallit Nunaata Eqqartuussivianut suliarinnittussamut siulliusumut suliassiissutigineqarsinnaavoq.

Imm. 3. Naalakkersuisut imm. 1-im i aalajangersakkatigut piumasaasut malillugit Skatterådip § 56, § 57 kiisalu § 66, imm. 2 malillugit aalajangiineri Kalaallit Nunaata Eqqartuussivianut suliarinnittussamut siullermut suliassiissutigisinnaavaat. Suliassiissutigineqartoq tassaassaaq akileraartussaatitaq.".

19. § 70, imm. 2-mi oqaaseqatigiit aappaattut nutaatut ilanngunneqassaaq:

"Aktianilli amerlanernik piginnittusuusup selskabi selskabimut allamut, pineqartup aktianik amerlanernik piginnittuuffigisaamut pigisanik nalilinnik tunisaqarsimasoq atorunnaarsippagu, pigisat aningaasanngortitaaneranni iluanaarutit iluanaarutisiatut naatsorsorneqarneranni § 14, imm. 3-im maleruagassatut naatsorsuullugit isigneqassapput.".

Oqaaseqatigiit aappaat matuma kingorna tassaalerpoq oqaaseqatigiit pingajuat.

20. § 70-imi imm.2-p kingorna immikkoortutut nutaatut ilanngunneqassaaq:

"*Imm. 3.* Aktiaatilik aktianik amerlanernik piginnittusuusutut isigneqassaaq, tak. imm. 2, pineqartup nammineerluni imaluunniit katissimallugu apparisani, angajoqqaani, aatakkuni aanakkunilu aamma qitornat, ernuttat taakkualu katissimallugu apparisaat

peqatigalugit ukiut kingulliit tallimat ingerlaneranni aktiatigut aningaasaatit 25 pct.-ii amerlanerusulluunniit piffissami sumiluunniit pigisimappagit, imaluunniit piffissami tassani taasisinnaanerup nalingata 50 pct.-ii sinnerlugit taasisinnaasimappat. Qitornassaqarneq qitornavissiaqarnerlu kinguaariivinnermut sanilliunneqarput.".

Imm. 3 aamma 4 matuma kingorna tassaalerput imm. 4 aamma 5.

21. § 70-ip kingornanut ilanngunneqassaaq:

"**§ 70 a.** Selskabi sulisorisat aktiaataannik utertitsilluni sulisunut allanut tuneqqitassanik pisisoq iluanaarutisianit akileraarutit selskabip akileraarfittut kommuniani, tak. § 33, qaammatisiutit malillugit ukiumi pineqartumi procentit akileraarusiissutit tamarmiusut, tak. §§-it 27-miit 29-mut, aamma procentip selskabip akileraarutaata § 26 a-mi aalajangersarneqartup assigiinngissutaattut annertutigisut unerartissavai.

Imm. 2. Selskabip aningaasanik niuerfimmi nalunaarsorneqarsimasup nammineq aktiaatini utertillugit pisiarigunigit iluanaarutisianit akileraarutinik imm. 1-im i taaneqartutuulli unerartitsissaq.

Imm. 3. Selskabimi, aktianik amerlanernik piginnittuusup pigisaasa aningaasanngortitaanerat iluanaarutitut isigineqarpat tak. § 70, imm. 2, oqaaseqatigiit aappaannisuulli iluanaarutisianit akileraarutinik imm. 1-im i taaneqartutuulli unerartinneqassapput.

Imm. 4. Selskabi kinguaariit nikinnerannut atatillugu aningaasanik agguassippat iluanaarutisianik akileraarummik imm. 1-im i taaneqartutuulli unerartitsissaq, matumani aamma kinguaariit ingerlaavartumik nikittarneranni atsiornikkut isumaqatigiissuteqartoqarsimatillugu. Isumaqatigiissutit malillugit kinguaariit nikinngitsoorpata iluanaarutisianik akileraarutinik § 70, imm. 1 naapertorlugu, isumaqatigiissutip atorunnaerneraniit qaammat ataaseq qaangiutsinnagu selskabi akileraareersimassaaq, iluanaarutisianik akileraarut imm. 1 naapertorlugu siusinnerusukkut akilerneqarsimasoq ilanngaatigereerlugu.".

22. § 71-im oqaaseqatigiit aappaattut nutaatut ilanngunneqassaaq:

"Aningaasaatinik agguassineruppat iluanaarutisianik akileraarutit unerartitat killiliussamiit qaammat ataaseq qaangiutsinnagu akilerneqareersimassaaq."

Oqaaseqatigiit aappaannit taallimaannut matuma kingorna oqaaseqatigiit pingajuanniit arfernganunngortinneqassapput.

23. § 73 ima oqaasertaqassaaq:

"**§ 73.** Kinaluunniit § 3 naapertorlugu akileraartussaatitaangitsoq iluanaarutinik, § 70 imaluunniit § 70 a malillugu iluanaarutisiat akileraarutitaannik unerartitsiffiqineqarsimasunik pissarsisimappat akileraarutitaat communalbestyrelsip attuumassuteqartup qinnuteqartoqarneratigut utertissavai. Peqatigiiffilli suleqatigiillunilu iluanaarniaqatigiiffit § 1, imm. 1, nr. 12-im i taaneqartut § 3, imm. 2 naapertorlugu akileraarusiiffiqineqartussaanngikkaluarlutik iluanaarutisianit akileraarutit unerartinneqarsimasut utertissinnaanngilaat.".

24. § 86 ima oqaasertaqassaaq:

"**§ 86.** Inuussutissarsiummik ingerlassaqartoq naatsorsuusiortartoq kinaluunniit,

inatsisit malillugit naatsorsuusiortussaatitaaguni taamaanngikkuniluunniit akileraartarnermut oqartussaasunit qinnuigineqaruni pisussaavoq naatsorsuutinik bilaginillu ukiunut naatsorsuusiorfinnut siusinnerusunut ukiumullu naatsorsuusiorfimmut ingerlasumut tunngasunik nassiussissalluni. Pisussaaffik aammattaaq atuuppoq allakkianut allanik akileraarusiinermut, matumani aamma nunamut maanga akileraartussaatitaanerup aalajangiiffingineqarnissaanut pingaaruteqarsinnaasunik nassiussissalluni. Nassiusisussaataitaanermi aamma ilaapput akileraartussaatitaasup nunami allami, Danmarkimi Savalimmiuniluunniit suliffeqarfiaanut tunngatillugu naatsorsuutinut il.il. tunngasut.

Imm. 2. Aamma taamaaliornissamut imm. 1 malillugu pisussaapput kikkulluunniit inatsisit tungaasigut inuttut isigineqarsinnaasut, inuussutissarsiuteqartuugunik taamaattuunngikkunilluunniit.

Imm. 3. Naatsorsuutit il.il. inummi pingajuusumiippata taassuma taakkuninnga tunniussinngikkallarsinnaatitaagaluaruniluunniit akileraartarnermut oqartussaasunit qinnuigineqaruni tunniutissavai, taakkulu atortussat atoreerunikit inummut pingajuusumut tassunga utertinneqarnissaat isumagissavaat.

Imm. 4. Akileraartarnermut oqartussaasut eqqartuussisunit akuersissummik peqaqqaanngikkaluarlutik kinaassutsiminnik upternarsaateqarlutik sukkulluunniit pisariaqartutut isigineqarpat imm. 1-imi 2-milu inuit taaneqartut sumiiffianniillutik misissuinissamut piginnaatitaapput. Misissuisinnaatitaanermut piginnaatitaanerup ilaatigut ilaqtarinneqarpoq taakku naatsorsuutaannik bilaginillu aammalu allakkianik allanik akileraarusiinermut pingaaruteqarsinnaasunik misissuinissamut aammalu karsimiittutinik assigisaannillu naatsorsuinissamut piginnaatitaaneq. Maleruagassat taakku malillugit akileraartarnermut oqartussaasut aamma inuussutissarsiuteqartut sumiiffianniillutik quersuarmiittutinik (lagerimiittutinik), nersutaatinik, pequtinik, maskiinanik ingerlatsinermilu atortunik allanik naatsorsuisinnaatitaallutilu naliliisinnaatitaapput. Piginnittup taassumalu sulisuisa akileraartarnermut oqartussaasut misissuineranni pisariaqartitsineq naapertorlugu ilitsersuillutilu ikuutissapput.

Imm. 5. Paasissutissat naatsorsuutinut il.il. tunngasut qarasaasiani nalunaarsorneqarsimappata akileraartarnermut oqartussaasut paasissutissanik taakkuninnga takunnissinnaatitaanerat qarasaasianut aamma atutissaaq.

Imm. 6. Akileraartarnermut oqartussaasut imm. 4 naapertorlugu misissuinissaanni politiit ikuutissapput, maleruagassat Naalakkersuisut inatsisinillu atortitsinermi ministeriaqarfiup isumaqatigiinniarnerisigut aalajangersarneqartut naapertorlugit.".

25. § 87 atorunnaarsinnejqassaaq.

26. § 114 atorunnaarsinnejqassaaq.

27. § 115-imi, imm. 2-imi oqaaseqatigiit aappaat atorunnaarsinnejqarpoq.".

28. § 115-imi, imm. 5-mi allassimasoq "kommunini kommissioninik akileraarusiisartunik" allanngortinneqassaaq ima "kommunini akileraaruseriffiit".

29. § 115-imi, imm. 9-imi allassimasoq: "kommissionip akileraarusiisartup siunnersuuteqarneratigut". Peerneqassaaq.

30. Kapitali 11-imni qulequtsiunneqartoq: "Kommissioni akileraarusiisartoq", atorunnaarsinneqarpoq.

§ 2.

Inatsisartut inatsisaat ulloq 1. januar 2005 aallarnerfigalugu atuuttuulissaaq.

Namminersornerullutik Oqartussat, ulloq xx.xxxxxxx. 2004.

Hans Enoksen

/

Josef Motzfeldt